

Baptist Church of Mizoram



**Kristian Chhungkaw Thuzir
2019**

(May 13-18, 2019)

Rev. Vanlalmuankima

Kristian Chhungkaw Thuzir - 2019

THUHMAHRUAI

BCM Assembly 2005 atanga Kristian Chhungkaw chawlhkar hman ni se ti a a lo rel tawh chu, kumin 2019 pawh hian May 13-19 chhung hian hman tur a ni a. Heta kan thuzir tur min ziak sak tur hian Rev. Vanlalmuankima chu ruat a ni a. A ni'n a hun chep tak karah zir tur tha tak min buatsaih sak avangin a chungah kan lawm hle a ni.

He programme leh thuzir tur hi Kohhran leh chhungkaw tin ten ngai pawimawhin, hlawk tak leh thahnemngai taka hman i tum theuh ang u.

Dated Serkawn,
the 29th March, 2019



(REV. F. RAMDINMAWIA)
General Secretary
Baptist Church of Mizoram

Kristian Chhungkaw Thuzir - 2019

Date	Zirlai	Thupui
13.05.2019 <i>(Thawhtanni)</i>	Zirlai 1-na	Chhungkaw hlutna
14.05.2019 <i>(Thawhlehni)</i>	Zirlai 2-na	Chhungkaw Tawngtai hlutzia
15.05.2019 <i>(Nilaini)</i>	Sermon	Kan mamawh Kristian Chhungkua
16.05.2019 <i>(Ningani)</i>	Zirlai 3-na	Kristian Chhungkaw hmelma
17.05.2019 <i>(Zirtawpni)</i>	Zirlai 4-na	Chhungkaw hlim I din ang u
18.05.2019 <i>(Inrinni)</i>	<i>Tawngtai Inkhawm</i>	
19.05.2019 <i>(Pathianni Zing)</i>	Sermon	I inah rawngbawlna bul tan rawh
19.05.2019 <i>(Pathianni Zan)</i>	Sermon	Kristian Chhungkua leh Thianghlimna

ZIRLAI 1 NA

CHHUNGKAW HLOTNA

(Bible chhiar tur: Genensis 2: 18, 21- 24)

Tin, LALPA Pathian chuan, “Mihring amah chauh va awm hi a tha lo ve: amah tanpuitu tur a kawppui awm mi ka siamsak teh ang, a ti a.....Tichuan LALPA Pathian chuan Adama chu tui takin a muthilhtir a, tichuan a muhil ta a; tin, a nâk ruh pakhat a la a, chumi ai chu tisa a aw phui tir ta a. Tin, LALPA Pathian chuan Adama laka a lâk nâk ruh chu hmeichhiaah a siam a, Adama hnenah a hruai ta a. Tin, Adama chuan, “Hei zet chu ka ruh ang ruh neia, ka tisa ang tisa nei ngei chu a ni; Mipa laka lâk chhuah a nih avangin, ‘hmeichhia’ tih tur a ni ang’ a ti a. Chuvangin, mipain a nu leh a pa a kalsan ang a, a nupui a vuan ang; tichuan, tisa pumkhat an lo ni tawh ang”.

“Ngai teh, fanaute hi LALPA laka kan rochan an ni a; Rila rah hi a lawmman min pek a ni”.(Sam 127:3)

Bible bung hmasa berah hian chhungkaw hmasa ber lo awm tan dan kan hmu a (*Genesis 1: 26-30*). Bible zirtirna atang chuan chhungkua hi mihringin a din a ni satliah mai lo va, Pathian din, Pathianin duh taka a siam leh a buatsaih a lo ni. Pathianin chhungkua a buatsaihna chhan chu mihringte thatna tur leh a thilsiamte enkawltu atan a ni (*Genesis 1: 28, Genesis 2:18*). Chu chhungkuaah chuan nu leh pa, fate leh an thisen zawmpuite an chêng ho a ni.

Zirlai hmasa berah hian Chhungkua Pathianin min buatsaih dan kan zir ho dawn a ni.

1. Chhungkaw member tin hi Pathian thilpek kan ni:

Pathianin mihring Adama a siam a. Pathian thilsiam dangte chuan kawppui an nei theuh a, Adama erawh chuan kawppui a nei

ve lo a. Pathianin Adama tan a nupui tur thilpek Evi a pe ta a, chhungkaw bul țanna chu Pathian thilpek an lo ni ta a ni.

Sam 127:3-ah chuan, “*Fanaute hi Lalpa laka kan rochan an ni a; rila rah hi a lawmman min pek a ni,*” a ti a. Khawvela rochan kan dawn thinte chu sum leh pai, in leh lo, bungrua te an ni thin a. Pathianin rochan min pek erawh chu chhungkuuaa fanaute hi an ni a. Tin, Pathianin nu leh pate hnena *lawmman* min pekte an ni baw. Chuvangin chhungkaw member tinte hi Pathian thilpek kan ni a, Pathian thilpek a nih avangin a petu Pathian leh a dawngtute tan hian kan hlu êm êm a ni.

2. Chhungkua hi Kohhran hmasa ber kan ni:

Kohhran hi Biak in ni mai lovin, ringtu awmkhawm kan ni. Thuthlung Thar kohhran hi chhungkua atangin a ințan a. Isua khan inah a zirtir a, kohhran hmasaho kha inah an inkhawm a, nu leh pate chu an fate Lalpa duh anga kaihruai turin hrill kan ni a (Eph 6:4). Chhungkua hi kohhran hmasa ber kan lo ni a. Chhungkaw kohhranah chuan nu leh pa chu Pastor angin an thawk a, Sunday School zirtirtu an ni baw a. Chhungkua chuan Pathian chibai kan bûk ho a, fate chuan Pathian chibai bûk dan te, țawngțai dan te, Pathian fak dante an zir țanna hmun a ni.

3. Chhungkua chu Pathian hmangaihna a hual vel tur a ni:

Pathian thu chuan pasal chuan a nupui hmangaih tur leh nupui chu a pasalin a hmangaihna avang chuan a hnena intulut turin a ti a; pasalin a nupui a hmangaihna chhan tur leh nupui, a pasal hnena a intukluhna chhan tur chu Pathian hmangaihna vang a ni tur a ni (Eph 5:22-29). Fate pawhin Pathian hmangaihna avangin nu leh pa thu kan awih tur a ni a, nu leh pa pawhin kan fate enkawlna chu Pathian hmangaihna hnuaiyah chuan kan enkawl tur a ni (Ephesi 6:1-4).

Kristian Chhungkaw Thuzir - 2019

Pathian duh dan ang taka nu leh pa, fate an awm chuan chhungkuaah chuan Pathian hmangaihna a lo lang chhuak a, Pathian hmangaihna hual vel kara chhungkua lo awm chu a hluin a nuam êm êm a ni.

Chhungkua Pathianin min pek hlutzia hi i hre thar ila, min petu Pathian duh dan ang ngeiin chhungkua din i tum ang u.

ZIRLAI 2 NA

CHHUNGKAW ṬAWNGṬAI HLUTZIA
(Bible chhiar tur: Deuteronomy 6:5-9)

Thuhmahruai:

Chhungkaw ṭawngṭai hi Lalpa tana maicham kan buatsaihna hun a ni a, a hlu hle a ni. Bible-ah hian Pathian tana Maicham din chung chang hmun tam takah kan hmu a, Leviticus 6:8-13 ah chuan Maichama mei chu nung reng tur a nih thu vawi thum lai a sawi a ni. Chhungkaw maicham hi Nova te, Abrahama te, Isaka leh Jakoba te pawh khan an lo din tawh thin a; Joba chuan a fate ni tin a thian a, zing tinin Pathian hnenah halral inthawina a hlan sak thin (Joba 1:5). Chhungkaw maicham din chu kan chhungkua leh Pathian inkara inzawmna min siam saktu a nih avangin a pawimawh êm êm a ni. Pathian hian kan chhungkua theuh hi ṭha taka enkawl turin min duh thin a, nu leh pate chuan an fate Pathian duh dana enkawl turin min zirtir a ni. Deuteronomy 6:6-9 ah hetiang hian a sawi a, “*Tin, heng thu, vawiina ka pèk che u hi in thinlungah a chàm reng ang a; in fate ṭhahnemngai takin in zirtir ang a, in ina in ṭhut lai te, kawnga in kal lai te, in mut lai te, in thawh hun tein in sawi thin thur a ni,*” a ti a. Ephesi 6:4-ah chuan, “*Tin, nangni pate u, in fate tithinur suh ula, Lalpa thununnaah leh zilhnaah chuan enkawl zawk rawh u,*” a ti a ni.

1. Chhungkaw ṭawngṭai neih a harsa:

Tunlai khawvelah hian chhungkaw ṭawngṭai neih hi thil awlai lo tak mai a ni a, tunlai hmasawanna avang hian chhung tin kan buai êm êm a, kan ni tin nuna bet phone, TV leh computer te hian nasa takin min tibuai bawh thin a ni. Mahse, chhungkaw ṭawngṭai ṭha taka neih hi Kristian chhungkaw tan leh kan ram

tana thil pawimawh leh hlu êm êm mai a nih avangin chhungkaw
tawngtaina mumal taka neih hi kan tih ngei tur chu a ni si a ni.

2. Chhungkuaa Pathian biak tângkainate:

- 1) *Pathian nena inpawlna a ni:* Pathianin mihring min
siam chhan bul ber chu amah nena inpawlna neih hi a ni a
(Genesis 1:26, Mika 6:8). Chhungkuaa Pathian pawlna
kan neih hian Pathianin min siam chhan chu tihhlawhtlinin a
lo awm thin a ni.
- 2) *Pathian duh zawng kan inkawhbmuhna a ni:*
Chhungkua hi Kohhran hmasa ber a nih avangin
Chhungkaw tawngtaina hi Pathian duh zawng kan
inkawhbmuhna hmun pawimawh tak a ni.
- 3) *Chhungkaw inthunnunna siamtu a ni:* Chhungkaw
tawngtaina hun mumal taka neih thin hi chhungkaw
inthunnunna fel tak min siam saktu a ni a. Hmun hrang
hranga chhungkaw member awm darh hnuah pawh he
hun hian min vawng reng thin a, kan fate zel pawhin
inhrang an chan hnu pawhin vawn nun zel an duh thin.
- 4) *Pathian chibai bûk dan kan zir hona a ni:*
Chhungkaw tawngtainaah chuan Pathian thute chhiarin, hla
te kan sa a, kan tawngtai a; heng zawng zawng hi Pathian
biak dan kan zirna a ni tel a, chhungkaw tawngtaina mumal
tak nei thin chhungkua a mite chu mi dangte zinga an awm
huna tawngtai, Bible chhiar a ngaih chang pawhin tha takin
an ti thei thin.
- 5) *Naupangte Krista hnena kan hruaina a ni:* Kan
fate thlarau nun hi KNP zirtirtute, Sunday School zirtirtute

kutah kan dah ngawt tur a ni lo va, thahnemngai taka zirtir tura tih kan nih angin chhungkaw tawngtaina hi naupangte Krista hna kan hruaina kawng pawimawh tak a ni.

6) *Chhungkua min phuar khawm thin:* Chhungkaw tawngtaina chuan chhungkua hi tisa leh thlarau-ah min phuar khawm thin a. Chhungkaw tawngtai hunah chuan khawlaia lêngte pawhin haw an duh a, tin thlarau lamah pawh min phuarkhawm bawkw thin a ni.

7) *Chhungkaw hlim min siam saktu a ni:* Chhungkaw tinin kan duhtusam theuh chu chhungkaw hlim neih hi a ni ngei ang. Chhungkaw hlimna min pe theitu chu Pathian chauh a nih avangin chhungkuaa Pathian chibai bûk hi chhungkaw hlimna bul chu a ni.

8) *Krista Chanchin Tha hril zel tura inbuatsaihna a ni:* Chhungkaw tawngtaia Missionary tan te, Pathian rawngbawltute tana kan tawngtai thinna hian Chanchin Tha hril zel turin chhungkua min lo buatsaih a, kan hriat loh hlanin chhungkaw mimal tinah hna a thawkw thin a ni.

3. Chhungkaw tawngtai neih dan tha:

Chhungkua a zirin Chhungkaw tawngtai neih dan tha hi a inang lo thei ang a, hengte hi a tlangpuiin kan ngaihtuahna hruaitu atan lo zir ho ila.

- 1) Pathian be tur kan nih avangin pawlawh taka ti lovin, puithu taka buatsaih tum a tha.
- 2) Kan chhungkaw remchan dan ang berin a hun ruat bik neih a tha.
- 3) Chhungkaw member tinten a inchhawk a hman theih ni se.

Kristian Chhungkaw Thuzir - 2019

- 4) Inhauh nan leh ngaih mawh zawng sawi vakna atan hman loh tur.
- 5) Chhungkaw dinhmun a zira hun hman thiam a pawimawh; chhungkaw memberte tana huphurhawm khawpa hun hman thin hi a tha ber lo thei ang.
- 6) Naupangin thuvawn sawi te, a theih chuan hla sak hote hi thil tha tak a ni.
- 7) Tawngtai thupui fel taka siam a, kan chhungte hmun hranga awm te, kan rawngbawl puite tana tawngtai hun siam thlapte hi thil duhawm tak a ni.

4. Chhungkaw tawngtaina neih i tum theuh ang u:

Ni tinin Pathianin darkar 24 min pe ziah a. Darkar 24 atanga minute 10-20 vel chhungkuaa Pathian biak nana hun hman hi chu thil tihawm tak mai a ni. Kan hun tam tak hi thil tul lo leh tangkai lo-ah kan hmang tam hle thin a. Chhungkaw tawngtaina neih hi chhungkaw tan a hlut em avangin neih i tum theuh teh ang u.

ZIRLAI 3 NA

KRISTIAN CHHUNGKAW HMELMA

(Bible chhiar tur: Malakia 3: 15-16)

Thuhmahruai:

Chhungkaw hmasa ber Adamate chhungkua chuan hmelma an nei nghal a, Setana chuan Pathianin a din chhungkua chu tihchhiat a tum a ni. Vawiin thlengin Kristian chhungkaw hmelma lian ber chu Setana hi a la ni reng a. Pathian chuan chhungkaw hlim min din sak a duh a; Setana chuan chhungkaw hrehawm taka siam a tum thung a. Pathian chuan amah nena inpawl thin chhungkua din a tum a; Setana chuan Pathian nena in mihran chhungkua din turin tan a la thung a. Pathian chuan hmangaihnaa inphuarkhawm chhungkua din a tum laiin Setana chuan chhungkaw kehchhia dinsak min tum thung a ni. Pathian duh dan ang ni lo chhungkua Setanan min dinsak a tumnaah hian hmanraw hrang hrang a hmang thin a. Tunlai khawvela Kristian chhungkaw hmelma lian deuh deuhthe kan zir ho dawn a ni.

1. Ruihhlo:

Ruihhlo kan tih hian zu leh drugs hi kan rilru a lian ber a ni thei ang. Zu leh drugs avangin kan fate, kan thalaite an thi phawk phawk mai a. Jeremia 9:21-ah chuan heti hian kan hmu a, *“Kan tukverhah te thihna lâwn lûtin, kan lal inah te a lût tawh si a; pâwn ațangin naupang tibo tur leh, khawlai ata tlangval tibo turin,”* tiin. Vawiina kan ramin ruihhlo avanga harsatna kan tawh hi mimal leh chhungkaw mal harsatna a ni tawh lo va; mi tin, chhungkaw tin, kohhran leh khawtlang, ramin harsatna a tawh a ni. Ruihhlo hi vawiina kan rama Kristian chhungkaw hmelma lian ber a ni a tih theih awm e.

Kum 2018-a Mizoram Assembly thut khawma Home Minister-in drugs chungchanga report a pêkah chuan kum 34 chhung

Kristian Chhungkaw Thuzir - 2019

(1984) atangin drugs avangin mi 1460 an thi tawh a, chung zinga 163 chu hmeichhia an ni. A report pek kum chhung 2017-18 hian drugs vangin mi 65 an thi a, chung zingah chuan hmeichhia 12 an tel a. Heng thi zinga 28 te hi Heroin overdose vang an ni¹. Heng hi sawrkarin official-a a chhinchhiah theih chauhte an ni a, heng bakah hian chhinchhiah loh mi tam tak an awm ngei ang. Drugs avangin chhungkaw tam tak an rûm a, kan hmangaih tak takte kir leh tawh loh turin thlanmualah an liam zawih zawih mai a ni.

Zu chungchanga *MLPC Study group*-in kum 2018-a Aizawl chhung chauh a zir chianna atanga a thil hmuh chhuah thenkhat chu hetiang hi a ni²:

- 1) Zu ruih vanga hnathawh theih loh avanga sum hloh zat : Nuai 948
- 2) Zu kaihhnawih chetsualna avanga damloten hna an thawh theih loh vanga an hloh zat : Nuai 240.69
- 3) Thih hun hmaa thi te avanga hlohna : Nuai 25,729
- 4) Zu avanga tawhsual tawk enkawlna senso : Nuai 409
- 5) Zu avanga damlo enkawlna senso : Nuai 635.36
- 6) Zu laka khawtlang vawn him nana police-te senso : Nuai 363
- 7) Tâng enkawlna senso : Nuai 120
- 8) Zu avanga mangangten Women's helpline an biak zat : Call 406

- 9) Zu avanga mangangten Women's helpline an biak atanga case awm te : 74

(Women's Helpline-in hmeichhe ral̄ti-te hnen atanga call a dawn zawng zawng zatve hmaw̄k chu zu avanga manganna thleng kaih̄hnaw ih a ni.)

- 10) Zu in mi 61% in an chhungkuaah zu vangin innghirghona a thleng an ti.

Zu leh drugs bawihā tâng tawhte tan hian chhuah a harsat tawh em avangin, kan fate lo thanglian mek hi Pathian thu nen theih tawp chhuaha chhungkaw tinin kan invên hi a ngai tawh takzet a ni. Zu hi pa tam tak, an that lai hun TKP ah tha taka lo hmang tawhte pawh hian an upat lamah, an hnain a zir loh avang te, nun thlahdah avang tea in a, nghet taka zu bawihā tâng ta hi mi tam tak an awm a, zu in lo tura kan nun kan invawn a tul êm êm a ni.

2. Mipat hmeichhiatna suala tl̄uk:

Kristian chhungkaw hmelma lian tak dang leh chu mipat hmeichhiatna suala tl̄uk luh hi a ni. Pathianin Israelte lal atana a thlan Davida meuh pawh kha he suala a tl̄uk luh avangin nasa tak maiin a chhungkuain a tuar a, inthahna hial leh inrem lohna lian tak maiin a tibuai a ni.

Kan ramah hian uire na sual avanga chhungkaw keh chhe ta leh chumi avanga fate enkawltu mumal awm lo, ruihhlo ngai ta mi tam tak an awm a. KS tam takte hi chhungkaw kehchhia avanga lo KS ta an ni. Mipat hmeichhiatna suala tluk luh hi Setana hmanraw tha ber a ni a, Kristian tha tak tak pawh a thlêm thlu a, chhung tin kan fimkhur a ngai êm êm a ni.

3. Sum leh pai ûmna:

Khawvel hmasawn zêl hian mamawh min ngah tir tawlh tawlh a. Mihring nun hian duhâm chin tawk a nei bawh lo a ni. Anania leh a nupui Saphiri thihna a ûm lûttu chu sum leh paia duhâmna hi a ni a (Tirkohte 5: 1-11). Vawiina mi tam tak ruihhlo bawiha an luhna chhan te, uirena leh inngaihna suala an tluk luhna chhan te hi sum leh pai kan ûmna leh kan duhâm lutuk vang a ni.

Kristian chhungkaw tinte hian duhâm chin tâwk i nei thiam ang u. Khawvelin a sawi thin chu, “Ka duh, ka mamawh” tih a ni a, Lalpa neitute erawh chuan, “Ka tlachham lo” (Sam 23:1) an ti thin a ni.

Thu laknate:

- 1. The Telegraph, March 23, 2018*
- 2. Lunglen.com July 24, 2018*

THUZIR 4 NA

CHHUNGKAW HLIM I DIN ANG U

(Bible Chhiar tur: Sam 128)

Thuhmahruai:

Pathianin chhungkaw tin min duhsakna chu, “Chhungkaw hlim leh chhungkaw nuam” min din sak hi a ni (Sam 133, Sam 128). ‘Chhungkaw hlim’ kan tih hian ka rilruah sap hovin ‘*Home Sweet Home*’ an tih hi a lo lang thin. Kan in nawmna chu a in nalh leh mawina lam ni lovin, a chhûnga chêngte hlimna leh lâwmna leh inhmangaih tlannaah hian a inngat tlat a ni. Eng vangin nge kan zina, mi in nuam taka kan awm theih a, ei leh in pawh a tui tha tha, kan buai pui pawh ngai miah lo a kan ei theih lai a, kan in leh lo nuam lo zawkah pawh haw thuai thuai kan thlakhleleh thin? A chhan chu kan in leh lo-ah chuan, kan hmangaihte an chêng a, kan hmangaihte nena hlim taka chênho thuai thuai kan chak thin vang a ni. Tunlai khawvelah hian an in leh lo thlahlel rêng rêng tawh lo, mi chuang nia inhria, chhungkaw hlimna tawng rêng rêng tawh lo mi tam tak kan awm ta. Pathianin min duhsakna erawh chu a la pangngai reng a, chhungkaw hlim tak, chhungkaw nuam tak min siamsak hi Pathian rilru chu a ni reng a ni.

Engtin nge chhungkaw hlim chu kan din ang le?

1. Hmangaihna:

Chhungkaw hlimawm tak min siam saktu chu hmangaihna min phuar khawmna hi a ni. Pa berin a nupui fanaute a hmangaih a, a hmangaihna avanga an tan thil tha tinreng thawhsak tura a inpêkna te; chumi chhân lêtna tura nuin a pasal leh a fate laka a hmangaihna hmêl a tih lanna leh a hmangaihna avanga a inpêkna zawng zawng te. Chu hmangaihna a hual vêl kara naupangte thlamuang tak leh hlim tak maia an han awm dial dial maite hi Chhungkaw hlim (*Home Sweet home*) chu a lo

Kristian Chhungkaw Thuzir - 2019

ni. Chu hmangaihna in a phuar vel chu Pathian hmangaihna atangin a lo pâr chhuak thei thin a ni. Kristian chhungkua nih hi a va lo hlu em!

2. Pawimawhna neih ve:

Chhungkaw hlim min siamtu, kan zin pawha haw thuai thuai kan châkna chhan chu, chu kan inah chuan mi pawimawh tak mai ka nih vang a ni. Mi tin mai hian nuam kan tih berna hmun chu ngaih pawimawh kan hlawnhna hmun zel hi a lo ni. Pa ber chuan kan inah chuan pa ber ka nih angin pawimawhna hrang hrang ka nei a, ka tel lo chuan kan inchnung khawsak inrelbawlna a buai vek a. Nu ber chuan nu ka nihna angin kan inchnungah chuan pawimawhna tam tak ka nei a, ka awm loh chuan inchnung chu a ruak a, ka pasal leh ka fate an tlei lo. Fa chuan fa ka nihna angin pawimawhna lian tak mai ka nei a, keimahah ka nu leh pate mit a fu a, ka lèn rei deuhte hian min ngaihtuah a, ka tel lo chuan ka nu leh pate, ka unaute nun a kim lo a ni. Chu pawimawh nihna kan neih theuhna chuan kan chhungkua chu min ngaih tir a, chutiang chhungkuaah chuan kan hlim a, nuam ka lo ti thin a ni.

Hetiang inchnung dinhmun hi Bible pawhin heti hian a sawi a: *“Ngai teh, Unaute inngeih dial diala awm khawm hi a va thain, a va nuam em!” (Sam 133:1)*

Hetiang inchnunga chêngte hian nuam an tiin an hlim a, an infak tawn a, *“A fate chu an tho va, (an nu chu) Engthawli an ti a, a pasal pawhin a fak a” (Thufingte 31:28)*

Hetiang taka ‘Chhungkaw Hlimawm’ hi Krista nen chuan a din theih a, din i tum ang u.
